

Na osnovu člana 24. stav 1. tačka c) Ustava Tuzlanskog kantona (“Službene novine Tuzlansko- podrinjskog kantona”, br. 7/97 i 3/99 i “Službene novine Tuzlanskog kantona”, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj dana _____, donosi

ZAKON O IZMJENAMA I DOPUNAMA ZAKONA O MINISTARSTVIMA I DRUGIM ORGANIMA UPRAVE TUZLANSKOG KANTONA

Član 1.

U Zakonu o ministarstvima i drugim organima uprave Tuzlanskog kantona (“Službene novine Tuzlanskog kantona“, br. 17/00, 3/01, 12/03, 10/05, 3/08, 8/11 i 15/13) član 5. mijenja se i glasi:

Član 5.

1. Ministarstvo unutrašnjih poslova,
2. Ministarstvo pravosuđa i uprave,
3. Ministarstvo obrazovanja i nauke,
4. Ministarstvo prostornog uređenja i zaštite okolice,
5. Ministarstvo finansija,
6. Ministarstvo privrede,
7. Ministarstvo trgovine, turizma i saobraćaja,
8. Ministarstvo poljoprivrede, šumarstva i vodoprivrede ,
9. Ministarstvo zdravstva,
10. Ministarstvo za rad, socijalnu politiku i povratak,
11. Ministarstvo za kulturu, sport i mlade,
12. Ministarstvo za boračka pitanja.

Član 2.

Član 8. mijenja se i glasi:

“Član 8.

Ministarstvo obrazovanja i nauke vrši upravne i druge stručne poslove koji se odnose na:

- obezbjeđivanje primjene najviših standarda ljudskih prava i sloboda utvrđenih međunarodnim aktima, ustavima i zakonima u oblastima iz nadležnosti Ministarstva;
- predškolski i osnovni odgoj i obrazovanje;
- srednje i srednje stručno obrazovanje, obrazovanje za obavljanje vezanih obrta, obrazovanje odraslih i visoko obrazovanje;
- pripremu prijedloga dugoročnog programa razvoja i koncepciju odgojno-obrazovnih ustanova;
- donošenje pedagoških standarda i normativa prostora, opreme i nastavnih sredstava za predškolski odgoj, osnovno, srednje i visoko obrazovanje;
- vođenje registara odgojno-obrazovnih ustanova predškolskog odgoja, osnovnog, srednjeg i visokog obrazovanja i obrazovanja odraslih;
- praćenje i poboljšanje učeničkog i studentskog standarda;
- praćenje i razvoj naučnoistraživačke djelatnosti i naučnotehničkih informacija i komunikacija na području Kantona te provođenje propisa iz ove oblasti;
- provođenje propisa iz oblasti sigurnosti saobraćaja na putevima u Bosni i Hercegovini, u dijelu kojim su utvrđene nadležnosti Ministarstva;
- vođenje registra naučnoistraživačkih ustanova;
- vođenje baze podataka odgojno-obrazovnih i naučnoistraživačkih ustanova kao i drugih pravnih i fizičkih lica nad čijim radom nadzor vrši Ministarstvo;
- nadzor nad zakonitošću rada ustanova i drugih pravnih i fizičkih lica iz oblasti obrazovanja i nauke;

- pripremanje nacrti i prijedloga zakona i drugih propisa iz nadležnosti Ministarstva i donošenje provedbenih propisa kada je to zakonom određeno;
- rješavanje o upravnim stvarima iz nadležnosti Ministarstva;
- izdavanje isprava iz nadležnosti Ministarstva i vođenje propisanih službenih evidencija;
- vršenje drugih poslova iz ove oblasti u skladu sa zakonom i drugim propisima.”.

Član 3.

Član 11. mijenja se i glasi:

“Član 11.

Ministarstvo privrede vrši upravne i druge stručne poslove koji se odnose na:

- obezbjeđivanje primjene najviših standarda ljudskih prava i sloboda utvrđenih međunarodnim aktima, ustavima i zakonima u oblastima iz nadležnosti Ministarstva;
- provođenje politike u oblasti industrije, poduzetništva, rudarstva i energetike;
- praćenje proizvodnje i preduzimanje odgovarajućih mjera za njeno ostvarenje i unapređenje u privrednim subjektima prema kojima ovlašćenja i obaveze vlasnika kapitala vrši Kanton;
- praćenje geoloških istraživanja i eksploatacije mineralnih sirovina u skladu sa zakonima;
- iskorištavanje prirodnih bogatstava;
- aktivnosti na provođenju postupaka dodjele koncesija iz nadležnosti Ministarstva;
- učestvovanje u procesu tranzicije i privatizacije privrednih društava u oblastima iz nadležnosti Ministarstva;
- praćenje i analiziranje stanja u oblastima iz nadležnosti Ministarstva i predlaganje odgovarajućih mjera;
- informisanje Vlade o stanju i kretanjima u oblastima iz nadležnosti Ministarstva;
- predlaganje propisa, projekata i programa koji podstiču ulaganja u razvoj privrede Kantona;
- saradnja sa naučnim i stručnim institucijama, tehnološkim parkovima i poslovnim inkubatorima u zastupanju interesa razvoja Kantona;
- implementacija projekata od značaja za Kanton, upravljanje domaćim i stranim sredstvima namijenjenim za realizaciju tih projekata;
- utvrđivanje priritetnih programa razvoja i Prijedloga Programa javnih investicija Kantona;
- praćenje implementacije usvojenih projekata i informisanja o ostalim pitanjima bitnim za ostvarivanje procesa razvoja Kantona;
- koordinaciju rada sa resornim ministarstvima u Kantonu, lokalnom samoupravom, stranim vladinim i nevladinim organizacijama čija se djelatnost odnosi na razvoj, poduzetništvo, obrtništvo i poduzetničku infrastrukturu;
- učestvovanje u izradi strategije razvoja Kantona, Federacije BiH i države BiH vezano za oblast industrije, rudarstva, energetike i poduzetništva;
- podršku jačanju konkurentnosti subjekata male privrede, promocija poduzetništva i obrtništva kao i sistemsko podsticanje razvoja privrede Kantona;
- praćenje rada organa upravljanja u privrednim društvima sa učešćem državnog kapitala koja obavljaju djelatnosti iz nadležnosti Ministarstva;
- pripremanje nacrti i prijedloga zakona i drugih propisa iz nadležnosti Ministarstva i donošenje provedbenih propisa kada je to zakonom određeno;
- izradu stručnih analiza i izvještaja;
- rješavanje upravnih stvari iz nadležnosti Ministarstva;
- vršenje drugih poslova u skladu sa zakonom i drugim propisima.”

Član 4.

U članu 12. iza stava 1. dodaju se stavovi 2. i 3. koji glase:

„U sastavu Ministarstva trgovine, turizma i saobraćaja je upravna organizacija: Kantonalna direkcija robnih rezervi.

Kantonalna direkcija robnih rezervi je upravna organizacija koja vrši stručne i druge poslove od posebnog interesa za Kanton, koji se odnose na:

- nabavku, razmještaj, zadržavanje, čuvanje i korištenje robnih rezervi
- formiranje robnih rezervi u skladu s planom robnih rezervi ugovaranjem proizvodnje pojedinih proizvoda, otkupom tržišnih viškova poljoprivrednih proizvoda, deponiranjem novca i na druge načine;
- korištenje robnih rezervi u skladu sa zakonom, drugim propisima i podzakonskim aktima;
- predlaganje provedbenih propisa i drugih akata iz svoje nadležnosti koje donosi Vlada Kantona u skladu sa zakonom;
- provođenje drugih mjera u cilju intervencije na tržištu u skladu sa zakonom i drugim propisima;
- bilansiranje roba za potrebe rezervi Kantona;
- saradnju sa organima za robne rezerve u Federaciji, drugim kantonima, gradovima, općinama i privrednim društvima;
- vršenje drugih poslova u vezi sa robnim rezervama u skladu sa zakonom i drugim propisima ili po zahtjevu Vlade i Ministarstva trgovine, turizma i saobraćaja“.

Član 5.

Član 16. mijenja se i glasi:

“Član 16.

Ministarstvo za kulturu, sport i mlade vrši upravne i druge stručne poslove koji se odnose na:

- obezbjeđivanje primjene najviših standarda ljudskih prava i sloboda utvrđenih međunarodnim aktima, ustavima i zakonima u oblastima iz nadležnosti Ministarstva;
- praćenje i razvoj djelatnosti kulture (muzejske, arhivske, bibliotečke, izdavačke, pozorišne, muzičke, likovne, filmske i druge djelatnosti kulture);
- zaštitu i korišćenje kulturno-historijskog naslijeđa;
- utvrđivanje standarda i normativa za obavljanje djelatnosti u oblasti kulture;
- vođenje registara ustanova kulture i drugih pravnih i fizičkih lica, koja obavljaju djelatnosti iz oblasti kulture;
- praćenje stanja i poboljšanje obavljanja djelatnosti iz oblasti tehničke kulture;
- praćenje i podržavanje sportista i sportskih udruženja od interesa za Kanton;
- vođenje registara sportista i pravnih subjekata koji obavljaju djelatnosti iz oblasti sporta;
- utvrđivanje politike u vezi sa obezbjeđenjem radija i televizije i pripremu propisa koji regulišu sistem informisanja;
- vođenje baze podataka ustanova kulture, sporta i informisanja, kao i drugih pravnih i fizičkih lica nad čijim radom nadzor vrši Ministarstvo;
- nadzor nad zakonitošću rada ustanova i drugih pravnih i fizičkih lica iz oblasti kulture, sporta i informisanja;
- definisanje i provedba strategije prema mladima;
- definisanje i provođenje kantonalnih programa djelovanja za mlade u pojedinim oblastima omladinskog sektora propisanih Zakonom o mladima Federacije BiH;

- praćenje pružanja potpore mladima koja dolazi od nevladinog sektora;
- vođenje spiska udruženja, institucija, ustanova, međunarodnih i drugih organizacija koje rade s mladima ili pružaju potporu omladinskim aktivnostima;
- koordinacija aktivnosti u vezi s radom s mladima i omladinskim aktivnostima;
- uočavanje negativnih uticaja na mlade bilo koje institucije, udruženja ili organizacije, uključujući i međunarodne organizacije, a koji su u suprotnosti sa Ustavom i zakonom, kao i predlaganje za poduzimanje zakonskih mjera koje provode nadležna tijela;
- savjetovanje mladih i njihovih predstavnika, naročito o pravnim postupcima ostvarivanja prava i izvršavanja obaveza koje se temelje na Zakonu o mladima Federacije BiH i drugim zakonima;
- osiguranje minimuma mjera na planu rada s mladima i omladinskih aktivnosti, kao i mehanizama i kapaciteta propisanih Zakonom o mladima Federacije BiH;
- pripremanje nacrti i prijedloga zakona i drugih propisa iz nadležnosti Ministarstva i donošenje provedbenih propisa kada je to zakonom određeno;
- rješavanje o upravnim stvarima iz nadležnosti Ministarstva;
- izdavanje isprava iz nadležnosti Ministarstva i vođenje propisanih službenih evidencija;
- vršenje drugih poslova iz ove oblasti u skladu sa zakonom i drugim propisima.”.

Član 6.

U članu 17a. u stavu 2. tekst „i Kantonalna direkcija robnih rezervi“ briše se.

Član 7.

Član 18 d. briše se.

Član 8.

Član 22. stav 2. mijenja se i glasi:

“Član 22.

U rukovođenju ministarstvom ministar:

- predstavlja i zastupa Ministarstvo, te organizuje izvršavanje poslova iz nadležnosti ministarstva;
- obezbjeđuje provođenje kantonalne politike i izvršavanje zakona i drugih propisa iz nadležnosti ministarstva;
- obezbjeđuje vršenje poslova i postupanje u skladu sa upustvima i smjericama Vlade Kantona o načinu sprovođenja utvrđene politike i izvršavanje kantonalnih zakona i drugih propisa u oblastima iz nadležnosti ministarstva;
- osigurava zakonito i efikasno obavljanje poslova iz nadležnosti ministarstva
- donosi podzakonske propise i druge opće i pojedinačne akte za koje je zakonom ovlašten.“.

Član 9.

Član 23. briše se.

Član 10.

Član 25. mijenja se i glasi:

“Član 25.

Ministar može biti lice koje ima najmanje VII stepen stručne spreme ili visoko obrazovanje najmanje prvog ciklusa Bolonjskog sistema studiranja koje se vrednuje sa 240 ECTS bodova i koje odgovara prirodi i vrsti posla iz nadležnosti ministarstva.”.

Član 11.

U članu 26. riječ “rukovodeći” zamjenjuje se riječju “državni”.

Član 12.

U članu 27. stav 2. mijenja se i glasi:

“ Način i postupak imenovanja i razrješenja, kao i ovlašćenja i odgovornosti direktora uprave i upravne organizacije se uređuju zakonom.”.

Član 13.

Član 28. mijenja se i glasi:

“Član 28.

Uslovi za imenovanje direktora uprave i upravne organizacije se utvrđuju propisom Vlade Kantona ako zakonom nije drugačije uređeno.”.

Član 14.

Iza člana 35o. dodaju se novi članovi 35p., 35r.,35s., 35t., 35u.,35v. i 35z. koji glase:

Član 35p.

Danom početka primjene ovog zakona Kantonalna direkcija robnih rezervi prestaje sa radom kao samostalna upravna organizacija i nastavlja sa radom kao upravna organizacija u sastavu Ministarstva trgovine, turizma i saobraćaja.

Direktor dosadašnje direkcije iz stava 1. ovog člana vršit će dužnost direktora upravne organizacije u sastavu ministarstva do imenovanja direktora u postupku propisanom zakonom.

Član 35r.

Ministarstvo privrede, Ministarstvo obrazovanja i nauke i Ministarstvo za kulturu, sport i mlade počinju sa radom danom stupanja na dužnost ministara koji rukovode tim ministarstvima.

Član 35s.

Danom početka rada Ministarstva privrede prestaju sa radom Ministarstvo industrije, energetike i rudarstva i Ministarstvo razvoja i poduzetništva.

Danom početka rada Ministarstva obrazovanja i nauke i Ministarstva za kulturu, sport i mlade prestaje s radom Ministarstvo obrazovanja, nauke, kulture i sporta.

Član 35t.

Ministar trgovine, turizma i saobraćaja je dužan donijeti novi Pravilnik o unutrašnjoj organizaciji Ministarstva u roku od 30 dana od dana početka primjene ovog zakona.

Ministri Ministarstva privrede, Ministarstva obrazovanja i nauke i Ministarstva za kulturu, sport i mlade su dužni donijeti nove pravilnike o unutrašnjoj organizaciji tih ministarstava u roku od 30 dana od dana stupanja na dužnost.

Član 35u.

U roku od 30 dana od dana donošenja pravilnika iz člana 35t. ovog zakona, izvršit će se postavljenje odnosno raspoređivanje državnih službenika i namještenika u skladu sa tim pravilnicima.

Član 35v.

Državni službenici i namještenici koji se na dan početka primjene ovog zakona zateknu u radnom odnosu u Kantonalnoj direkciji robnih rezervi, preuzimaju se u Ministarstvo trgovine, turizma i saobraćaja.

Vlada Kantona će donijeti odluku o prenosu sredstava, opreme, dokumentacije, arhive i dr. sa Kantonalne direkcije robnih rezervi na Ministarstvo trgovine, turizma i saobraćaja.

Član 35z.

Državni službenici i namještenici koji se na dan početka rada Ministarstva privrede zateknu u radnom odnosu u Ministarstvu industrije, energetike i rudarstva i Ministarstvu razvoja i poduzetništva preuzimaju se u Ministarstvo privrede.

Vlada Kantona će donijeti odluku o prenosu sredstava, opreme, dokumentacije, arhive i dr. sa Ministarstva industrije, energetike i rudarstva i Ministarstva razvoja i poduzetništva na Ministarstvo privrede.

Državni službenici i namještenici koji se zateknu u radnom odnosu u Ministarstvu obrazovanja, nauke, kulture i sporta, a koji koji rade na poslovima iz oblasti obrazovanja i nauke preuzimaju se u Ministarstvo obrazovanja i nauke danom početka rada tog ministarstva.

Državni službenici i namještenici koji se zateknu u radnom odnosu u Ministarstvu obrazovanja, nauke, kulture i sporta, a koji koji rade na poslovima iz oblasti kulture, sporta i informisanja preuzimaju se u Ministarstvo za kulturu, sport i mlade danom početka rada rada tog ministarstva.

Podjela sredstava, opreme, inventara, dokumentacije, arhive i dr. Ministarstva obrazovanja, nauke, kulture i sporta između Ministarstva obrazovanja i nauke i Ministarstva za kulturu, sport i mlade izvršit će se na osnovu odluke Vlade.

Član 15.

U roku od 30 dana od dana stupanja na snagu ovog zakona izvršit će se usklađivanje kantonalnih zakona i drugih propisa sa odredbama ovog zakona.

Član 16.

Ovlašćuje se Zakonodavno-pravna komisija Skupštine Tuzlanskog kantona da utvrdi prečišćen tekst Zakona o ministarstvima i drugim organima uprave Tuzlanskog kantona.

Član 17.

Ovaj zakon stupa na snagu osmog dana od dana objavljivanja u “Službenim novinama Tuzlanskog kantona”, a početak će se primjenjivati od 1.1.2018. godine.

Bosna i Hercegovina
Federacija Bosne i Hercegovine
TUZLANSKI KANTON
Skupština

Predsjedavajući
Skupštine Tuzlanskog kantona

Senad Alić, v.r.

Broj: _____
Tuzla, _____

Obrazloženje
uz nacrt Zakona o izmjenama i dopunama Zakona o ministarstvima i drugim
organima uprave Tuzlanskog kantona

I PRAVNI OSNOV

Pravni osnov za donošenje Zakona o izmjenama i dopunama Zakona o ministarstvima i drugim organima uprave Tuzlanskog kantona sadržan je u članu 24. stav 1. tačka c) Ustava Tuzlanskog kantona („Službene novine Tuzlansko – podrinjskog kantona“, br. 7/97 i 3/99 i „Službene novine Tuzlanskog kantona“, broj: 13/99, 10/00, 14/02, 6/04 i 10/04) kojim je utvrđeno da Skupština donosi zakone i ostale propise neophodne za izvršavanje nadležnosti Kantona.

II RAZLOZI ZA DONOŠENJE ZAKONA

Vlada Tuzlanskog kantona donijela je Zaključak broj: 02/1-05-38976/16 od 26.12.2016. godine, kojim je Ministarstvo pravosuđa i uprave zaduženo da u saradnji sa Ministarstvom obrazovanja, nauke, kulture i sporta, Ministarstvom industrije, energetike i rudarstva, Ministarstvom razvoja i poduzetništva i Ministarstvom trgovine, turizma i saobraćaja, sačini i Vladi Tuzlanskog kantona dostavi na razmatranje tekst radnog materijala za izmjene Zakona o ministarstvima i drugim organima uprave Tuzlanskog kantona („Službene novine Tuzlanskog kantona“, br. 17/00, 3/01, 12/03, 10/05, 3/08, 8/11 i 15/13).

U skladu sa raspravom sa Kolegija Vlade Tuzlanskog kantona pripremljen je nacrt predmetnog Zakona, a u skladu sa instrukcijama iz pomenutog Zaključka.

Razlozi za donošenje Zakona o izmjenama i dopunama Zakona o ministarstvima i drugim organima uprave Tuzlanskog kantona („Službene novine Tuzlanskog kantona“, br. 17/00, 3/01, 12/03, 10/05, 3/08, 8/11 i 15/13) su u činjenici da je potrebno izvršiti racionalizaciju poslova koji se obavljaju u pojedinim kantonalnim organima uprave: ministarstvima i upravnim organizacijama. Naime, iz tih razloga je predloženo spajanje Ministarstva razvoja i poduzetništva i Ministarstva industrije, energetike i rudarstva u jedno Ministarstvo koje bi nosilo naziv Ministarstvo privrede. Takođe, kada je u pitanju Kantonalna direkcija robnih rezervi kao samostalna upravna organizacija, predloženo je da, imajući u vidu nadležnosti Ministarstva trgovine, turizma i saobraćaja, ista bude u sastavu tog Ministarstva, cijeneći ujedno i potrebu gore pomenute racionalizacije u obavljanju poslova iz resornih nadležnosti tih organa.

Ujedno, je predloženo razdvajanje Ministarstva obrazovanja, nauke, kulture i sporta na dva ministarstva i to: Ministarstvo obrazovanja i nauke i Ministarstvo za kulturu, sport i mlade iz razloga poboljšanja i unapređenja oblasti kulture i sporta te odnosa zajednice prema mladima kroz utvrđene nadležnosti Ministarstva za kulturu, sport i mlade.

Osim navedenog, izmjene se odnose i na poboljšanje samog teksta Zakona i usklađivanje istog sa pozitivnim zakonodavstvom.

U skladu sa članom 128. Poslovnika Skupštine Tuzlanskog kantona – drugi prečišćeni tekst („Službene novine Tuzlanskog kantona“, br. 4/12, 3/13, 10/13, 15/13 i 2/14), a imajući u vidu da se radi o složenom zakonu, te da se isti bavi pitanjima koja su od posebnog značaja za sve kantonalne organe uprave i upravne organizacije, te da je potrebno izvršiti i šire konsultacije, predlažemo da se ovaj Zakon razmatra u formi nacrt, te da se o istom otvori javna rasprava.

III OBRAZLOŽENJE PRAVNIH RJEŠENJA

U članu 1. nacrtu Zakona o izmjenama i dopunama Zakona o ministarstvima i drugim organima uprave Tuzlanskog kantona predložena je izmjena člana 5. Zakona o ministarstvima i drugim organima uprave Tuzlanskog kantona, kojom se brišu ministarstva koja prestaju sa radom, a dodaju novi nazivi ministarstava koja se osnivaju ovim zakonom.

U članu 2. nacrtu Zakona o izmjenama i dopunama Zakona o ministarstvima i drugim organima uprave Tuzlanskog kantona predložena izmjena se odnosi na član 8. Zakona o ministarstvima i drugim organima uprave Tuzlanskog kantona, a kojom izmjenom se sada utvrđuju nadležnosti Ministarstva obrazovanja i nauke TK.

Članom 3. su predviđene određene izmjene člana 11. Zakona o ministarstvima i drugim organima uprave Tuzlanskog kantona, a koje se odnose na utvrđivanje nadležnosti novog Ministarstva privrede TK.

Članom 4. nacrtu Zakona o izmjenama i dopunama Zakona o ministarstvima i drugim organima uprave Tuzlanskog kantona predloženo je dodavanje novih stavova 2. i 3. u članu 12. Zakona, a kojim je utvrđeno da se u sastavu Ministarstva trgovine, turizma i saobraćaja nalazi upravna organizacija: Kantonalna direkcija robnih rezervi, te se ujedno utvrđuju i njene nadležnosti.

Članom 5. nacrtu Zakona o izmjenama i dopunama Zakona o ministarstvima i drugim organima uprave Tuzlanskog kantona predviđena je izmjena člana 16. Zakona kojim se umjesto dosadašnjeg Ministarstva razvoja i poduzetništva, utvrđuju nadležnosti novog Ministarstva za kulturu, sport i mlade TK.

U članu 6. nacrtu Zakona o izmjenama i dopunama Zakona o ministarstvima i drugim organima uprave Tuzlanskog kantona predloženo je brisanje Kantonalne direkcije robnih rezervi kao samostalne upravne organizacije, dok je **članom 7.** predviđeno brisanje člana 18d. Zakona kojim su utvrđene nadležnosti Kantonalne direkcije robnih rezervi kao samostalne upravne organizacije.

Članom 8. nacrtu Zakona o izmjenama i dopunama Zakona o ministarstvima i drugim organima uprave Tuzlanskog kantona predlaže se izmjena člana 22. Zakona kojim se utvrđuju nadležnosti i ovlaštenja ministra u rukovođenju ministarstvom te se u skladu sa tom izmjenom u **članu 9.** predlaže brisanje člana 23. Zakona.

Članom 10. Zakona o izmjenama i dopunama Zakona o ministarstvima i drugim organima uprave Tuzlanskog kantona predlaže se izmjena člana 25. Zakona kojim su utvrđeni uslovi koje moraju ispunjavati ministri da bi obavljali tu funkciju, na način da je izvršeno usklađivanje te odredbe sa pozitivnim zakonodavstvom.

Članom 11. nacrtu Zakona o izmjenama i dopunama Zakona o ministarstvima i drugim organima uprave Tuzlanskog kantona predloženo da se u članu 26. kojim je predviđeno da u slučaju odsutnosti ili spriječenosti za rad ministra, zamjenjuje ga rukovodeći službenik koga on odredi. Obzirom da novi Zakon o državnoj službi u Tuzlanskom kantonu ne poznaje kategoriju rukovodećih državnih službenika već samo određena radna mjesta državnih službenika, predloženo je da se riječ “rukovodeći” zamjeni riječju “državni” u skladu sa Zakonom o državnoj službi u Tuzlanskom kantonu.

Članom 12. nacrtu Zakona o izmjenama i dopunama Zakona o ministarstvima i drugim organima uprave Tuzlanskog kantona predviđena je izmjena člana 27. stava 2. Zakona koji utvrđuje način i postupak imenovanja direktora uprava i upravnih organizacija, na način da je izvršeno usklađivanje te odredbe sa pozitivnim zakonodavstvom. Naime način i postupak imenovanja direktora uprava i upravnih organizacija je utvrđen Zakonom o državnoj službi u Tuzlanskom kantonu.

Članom 13. nacrtu Zakona o izmjenama i dopunama Zakona o ministarstvima i drugim organima uprave Tuzlanskog kantona mijenja se član 28. Zakona kojim su utvrđeni uslovi za postavljenje na mjesto direktora uprava i upravnih organizacija, na način da se ti uslovi sada utvrđuju propisom Vlade Kantona.

Članom 14. nacrtu Zakona o izmjenama i dopunama Zakona o ministarstvima i drugim organima uprave Tuzlanskog kantona predloženo je dodavanje novih članova 35p., 35r.,

35s., 35t., 35u., 35v. i 35z. kojima je definisano: početak rada novih ministarstava, prestanak rada ministarstava koja se ukidaju ovim zakonom, promjena statusa Kantonalne direkcije robnih rezervi, obaveze rukovodioca kantonalnih organa uprave čiji se naziv odnosno stauts mijenja na izmjenu pravilnika o unutrašnjoj organizaciji, zatim preuzimanje zaposlenika, sredstava, opreme i drugog iz organa uprave čije se naziv odnosno status mijenja ovim zakonom.

Članom 15. nacrta Zakona o izmjenama i dopunama Zakona o ministarstvima i drugim organima uprave Tuzlanskog kantona predviđen je rok za usklađivanje kantonalnih zakona i drugih propisa sa ovim zakonom, dok se **članom 16.** ovlašćuje Zakonodavno-pravna komisija Skupštine Tuzlanskog kantona da utvrdi prečišćen tekst Zakona o ministarstvima i drugim organima uprave Tuzlanskog kantona, iz razloga postojanja većeg broja izmjena i dopuna ovog Zakona.

Članom 17. nacrta Zakona o izmjenama i dopunama Zakona o ministarstvima i drugim organima uprave Tuzlanskog kantona utvrđeno je stupanje na snagu i početak primjene zakona kao i objavljivanje u "Službenim novinama Tuzlanskog kantona".

IV FINANSIJSKA SREDSTVA ZA DONOŠENJE ZAKONA

Za provođenje ovog zakona potrebno je osigurati dodatna sredstva u Budžetu Tuzlanskog kantona za 2018. godinu u iznosu od cca. 345.730 KM, a koja će biti detaljno iskazana u Izjavi o fiskalnoj procjeni (Obrazac IFP-DA) koja je sastavni dio ovog zakona, a odnose se na sredstva za plate i druge naknade za 10 novih radnih mjesta državnih službenika i namještenika.

Pomenuta dodatna finansijska sredstva se odnose na planiranje najmanje 9 novih radnih mjesta državnih službenika i namještenika, neophodnih za obavljanje poslova osnovne djelatnosti Ministarstva za kulturu, sport i mlade tj. sredstva za plate i druge naknade. Dva državna službenika će, prema odredbama člana 35z. ovog zakona biti preuzeta iz Ministarstva obrazovanja, nauke, kulture i sporta, a koji su radili u odjeljenju za kulturu i sport pomenutog Ministarstva. Dakle radi se o Višem stručnom saradniku za kulturu i informisanje i Stručnom saradniku za sport, a koji bi bili raspoređeni na odgovarajuća radna mjesta u novoosnovanom Ministarstvu. Ostala radna mjesta, ukupno njih 9, bi se morala popunjavati na osnovu javnog konkursa ili na drugi način za koji se odluči rukovodilac organa državne službe.

Naime, u skladu sa Uredbom o načelima za utvrđivanje unutrašnje organizacije kantonalnih, gradskih i općinskih organa državne uprave („Službene novine Tuzlanskog kantona“, broj: 12/08) poslovi i zadaci iz nadležnosti kantonalnog organa uprave i kantonalne upravne organizacije obavljaju se u okviru organizacionih jedinica, koje se mogu formirati kao osnovne i unutrašnje organizacione jedinice. Osnovne organizacione jedinice mogu biti: sektor, odjeljenje i inspektorat. Shodno tome, ukoliko se u Ministarstvu za kulturu, sport i mlade formiraju odjeljenja kao organizacione jedinice (najmanje dvije osnovne organizacione jedinice), svako odjeljenje mora imati najmanje pet izvršilaca, odnosno izuzetno odjeljenje se može formirati i sa najmanje tri izvršioca. U prilogu je šematski prikaz unutrašnje organizacije i sistematizacije radnih mjesta Ministarstva za kulturu, sport i mlade, radi lakšeg praćenja svih datih podataka. Napominjemo da ista sadrži minimum radnih mjesta koja su predviđena pomenutom Uredbom. Takođe je priložen i šematski prikaz unutrašnje organizacije i sistematizacije radnih mjesta Ministarstva obrazovanja i nauke, a iz koga se vidi da su preuzeta dva zaposlenika koja su radila na poslovima kulture i sporta.

Takođe, što se tiče promjene statusa Kantonalne direkcije robnih rezervi u upravnu organizaciju koja bi se nalazila u sastavu Ministarstva trgovine, turizma i saobraćaja, potrebno je obezbjediti sredstva za planiranje novih radnih mjesta, odnosno najmanje jednog državnog

službenika neophodnog za obavljanje poslova osnovne djelatnosti direkcije, tj. sredstva za plate i ostale naknade u iznosu od cca.

Naime, Kantonalna direkcija robnih rezervi trenutno ima 2 uposlenika, a to su direktor i jedan namještenik (tehnički sekretar), a zaposlenici Ministarstva trgovine, turizma i saobraćaja nisu u mogućnosti obavljati i poslove koji su u nadležnosti Direkcije, zbog nedostatka stručnih kadrova u samom Ministarstvu.

Nadalje, ističemo da bi Ministarstvo razvoja i poduzetništva spajanjem sa Ministarstvom industrije, energetike i rudarstva u Ministarstvo privrede, postalo odjeljenje novog Ministarstva zajedno sa postojećim odjeljenjima Ministarstva industrije, energetike i rudarstva. U novoosnovano Ministarstvo privrede, prema članu 35z. ovog zakona bili bi preuzeti zaposlenici iz Ministarstva razvoja i poduzetništva, ukupno 12 državnih službenika i namještenika, te je u tom slučaju potrebno samo proširiti smještajne kapacitete Ministarstva industrije, energetike i rudarstva. U prilogu je i šematski prikaz novog Ministarstva privrede radi lakšeg praćenja svih podataka.

Tuzla, juli 2017. godine

**OBRADIVAČ
MINISTARSTVO PRAVOSUĐA I UPRAVE
TUZLANSKOG KANTONA**